

佛說法常住經

出安祐二錄開元錄云今附西晉錄

聞如是一時佛遊舍衛國祇樹給孤獨之園  
佛告諸比丘法者常存有佛無佛法住如故  
如來至真出現世間因為宣解分別深義敷  
演至慧志在小乘為說四諦苦集盡道生苦  
老苦病苦死苦求不得苦舉要言之有陰身  
苦設無有身當有何患是曰苦諦目貪於色

十二

耳鼻身口意亦復如是由此因緣成其六衰  
從來劫數甚大久矣既諦見斯已知為惡集  
悉無益身因守身行護其心口十惡以拔十  
二因緣根本則滅除三毒空無相願由成羅  
漢緣十二因知其牽連斷其根源輒成緣覺  
解身本空奉六度無極四等四恩道品之法

三十有七空無相願無此三事不為取證六  
通善權常濟危厄等心一切無所適莫故曰  
菩薩速不退轉當成無上正真之道為最正  
覺度脫十方故号為佛道法常存行者與合  
無彼無此猶如衆流未到海時各有本名以  
合于海無有異号道德若茲去來今佛合一

法身行與道合因為衆生分別演說陰衰諸  
入十二牽連皆為病疾諸度無極四等四恩  
為大法藥療衆生病淨如虛空明踰日光德  
超須彌神聖巍巍莫能譏謗衆罪消滅無復  
諸苦更以大慈悲度脫十方佛說是時諸比  
丘衆漏盡意解無數菩薩尋時速得無所從  
生法忍佛說如是諸比丘及諸菩薩諸天龍  
神阿須倫聞經歡喜皆前為佛作禮而去

佛說法常住經

行十

十三末